

Parlamentario Xiomara Maduro:

Un musico cu a stima Aruba y cu Aruba a stima, Robert Jeandor, a bay descansa

NOS a ricibi e tristo noticia cu Robert Jeandor, Aruba su yiu internacional a bay sosega cerca nos Creador. Na bida nos tabata tin e honor como Minister di Cultura di Aruba pa na cuater ocasion oficial por a reconoce e talento unico di Robert, su amor pa Aruba y nos dushi Papiamento.

BaluArte

Na juli 2019 den e buki BaluArte, cu ta e compilacion na Papiamento di Aruba su pilarnan cultural, Robert Jeandor ta wordo reconoci pa su 55 aniversario e tempo ey como baluarte cultural di Aruba.

Embahador cultural

Na februari 2020 na Fort Zoutman nos a reconoce Robert, unda nos a gradici'e pa su aporte inigualabel na Aruba su cultura y como un bon embahador cultural pa hiba esaki riba tarimanan internacional, na unda Robert tabata hopi aprecia y balora pa artistanan di caliber halto.

Crioyo di Oro

Nos tabata tin e honor tambe pa na december 2023, otorga e premio Crioyo di Oro na Robert Jeandor pa honra su 60 aniversario den farandula na Aruba y como embahador musical di nos Pais.

Amigonan di Robert Thiel

Sin lubida na juni 2024 na e momento bunita na unda den nomber di su amigo y tocayo Robert Thiel, nos por a brinda un reconocimiento di un amistad musical, cu a fortifica durante añanan di e pasion musical comparti.



RIP Robert Jeand'or

Robert Jeand'or cu su inigualabel talento

Ocasionnan cu a haci hopi hende contento

Briya den su musica gusta pa hopi den carnaval y na fiesta,

Ela hiba nomber di Aruba na top den arena musical local y internacional

Ruthy "Lady Ruth" tambe ta condoleer su bunita famia y nos dushi Aruba cu un acrostico special

Tur cu a stim'e, conoce, yora of hari of baila cu n'e, hopi consuelo

Jeand'or y coleganan musico y su rumannan den Cristo, hopi amor

Elo ta awor mas cerca di alma, mente y curason den brasa di su Creador

Aruba hamas lo lubida su bida ehemplar di alegria, fe y bendicion

Nos tur cu un cancion di dje, como nos favorito

Di Lady Ruth ta e cacion di Bolobonchi cu alegria den su grito!

Obon Dios di tur creacion cerca bo, bo yiu Robert Jeand'or ta bon, Den luz y na paz Den Tata Celestial su cas

Rondona pa angelnan den gloria, continua ayariba cu su bunita y inolvidabel historia.

Ruthy "Lady Ruth"

Nos aprecio sincero

Sinembargo, e reconocimiento mas special cu nos por a duna Robert na bida ta, ta e respet cu nos a brind'e na multiple ocasion ora nos como un Arubiano orguyoso di su yiu di tera, por a expresa cu un saludo, un brasa y un sunchi, nos gratitud sincero di profundo di nos curason, como aprecio grandi pa Robert su talento y amor pa Aruba.

Palabra di condolencia

Nos ta extende nos mas sentido palabra di condolencia na Robert su señora Vivian, su yiunan, demas famia, amistadnan, y specialmente na e musiconan di Aruba hopi forsa cu e perdida grandi aki.

Mensahe final

Nos mensahe final ta, cu Robert a wordo stima y aprecia na bida, y awe e amor eyan un biaha mas ta manifesta den nos curason y den nos oracion na Mama Maria di Alto Vista pa compana Robert na su yegada triunfante cerca nos bon Dios. Cu Robert Jeandor, Sosega na Paz.